

PHILIPPE CAZENAVE ATURRIALDEKO AIDES ELKARTEKO LEHENDAKARIA

«Hiesa azaldu zaien artean gero eta gehiago dira seropositiboak zirela ere ez zekitenak»

Aitor Renteria | BAIONA

Aturrialdeko Aides elkarteak Ipar Euskal Herrian kutsadura kasuek gora egin dutela azpimarratu du. Izan ere, Baionako ospitaleak 510 pertsonen tratamendua bermatzen du une honetan. Zenbaki hauek giberat eramaten gaituzte, gaitzaren kontrako tratamendu anitza indarrean ezarri aitzineko denboretara, 1996ko zenbakietara.

■ Nola ikusten duzu eritasunaren bilakaera?

Hiesa azaldu zaien artean, gero eta gehiago dira seropositiboak zirenik ere ez zekitenak. Azken ikerketetan, erdiak adierazi du ez zekiela. Baina zenbaki horiek bertze errealitate bat kukutzen dute, eritasunaren banaketarena hain zuzen ere, talde bakoitzaren baitako bilakaerarena. Adibide gisa, heterosexualek artean bizi-rik diraute aitziniritziek; hots, hiesa drogazale eta homosexualen artean hedatzen eta kutsatzen dela. Eta horrek ondorioak ekartzen ditu.

■ Zein dira ondorioak?

Hiesa hartu dutenen artean, heterosexualek %63k ez zekiten seropositibo zirenik. Drogazaleen artean, aldiz, %83k bazekiten. Oro har, 1998-2000ko epean azaldutako hies kasuak honela banatzen ziren: %17 heterosexualek, %42 homosexualak eta %23 toxikomanoak.

■ Zein da zure elkartearen eginkizuna?

Baionan dugun egoitza honek kudeatzen da departamendu osoko jarduerara. Biarion Euskal Herrian baino kasu gutxiago ematen dira, beraz, Baiona da departamendu burua hiesaren aurka. Hemen 158 pertsonari eskaintzen diogu orain laguntza. Horietariko 118k gizarte edo lege mailako arazoak dituzte. Bertzalde, 58k etxebizitza arazoak dituzte, eta guk eskuratu behar diegu aterpea. Eta Euskal Herrian izugarriko eskasia dago. Horrez gain, etortzen den jendeak diru arazoak ditu, eta laguntza maila guzietan eskaini behar diegu: etxebizitza, jantziak, elikadura...

■ Eta heriotzaren irudia eta beldurra beti agerian.

Bai, hori izan da elkartearen bertze eginbide bat. Duela bost urte heriotza bizitzeko ikastaldi batzuk egin genituen. 2000. urtean azken fasean zeuden 26



GAIZKA IROZ

BIZITZEKO GOGOA

«Lehen, eritasuna bera heriotzaren sinonimoa zen. Orain, hori aldatu da. Bizitzen jarraitzeko atxikimendua dute»

ANONIMOTASUNA

«Zenbakiak aipatzen ditugu, baina neke da departamenduan bertan zenbat seropositibo dagoen jakitea»

pertsonari eskaini genien laguntza hori, eta aurten gora egingen du zenbaki horrek; eriek bertze molde batean ikusten dutelako heriotza, hau da, begiz begi so egitera ausartzen dira.

■ Beraz, heriotza bertze molde batez bizi dute?

Bai, emazteek bereziki. Hemen bertan emazteei harrera egiteko gune berezi baten sortzea aztertzen ari gara. Lehen, eritasuna heriotzaren sinonimoa zen; orain, hori aldatu da. Bizitzen jarraitzeko atxikimendua dute, egunerokotasunean. Anitzek ama izateko gutuziaz. Bizi egitasmoa daukate, eta hori berria da. Bertze batzuek haurrak dituzte, eta eritasunarekin bizi behar dute amek.

■ Nola pausatzen da zuen lana?

Astelehenero bazkari bat egiten dugu eriekin. Xedea xumea bezain garrantzitsua da. Bizia- ren gustua eskaini nahi diegu, eta bizitzeko bitartekoak eskaini. Horregatik, erakutsi nahi diegu aurrekontu txiki batekin bizi daitekeela: elkarrekin joaten gara erosketak egitera, gero hemen prestatzen dugu bazkaria, elkarrekin jan... Astero 3-4 pertsona ezberdin gonbidatzen dira. Joan den astean bi emazte ekarri genituen, bakoitza bere haurrarekin. Lauak dira seropositiboak. Bazkariaren hondarrean elkarri aipatzen zioten bakoitzaren esperientzia. Eta gogorra da ama bati hori entzutea.

■ Drogaren inguruan ere lan zehatza egiten duzue.

Bai, xiringak aldatzen dizkiegu. Hilabetero 3.000 xiringa inguru banatzen ditugu; urtero 35.000. Eta kontuan hartu guk arratsaldean irekitzen dugula. Horri gehitu behar zaio goizetan ARIT elkarteak banatzen dituenak eta gauez Baionako Ospitaleak banatzen dituenak. Lehen, telefono bat atxikitzen genuen gau eta egun. Antzarak perratzera joan zitzaigun egitasmoa. Eta hor datza gakoa. Nola eskaini jendeari hurbiltasuna eta urruntasuna denbora berean? Hurbiltasuna laguntza zehatza behar dutelako, entzutea eta aterabideak eskain-

tzea. Eta urrunekoa anonimotasun osoa atxiki nahi dutelako anitzek. Zenbakiak aipatzen ditugu, baina neke da jakitea departamenduan bertan zenbat seropositibo dagoen. Anitzek ondoko departamenduetara jotzen du, Bordelera bereziki.

■ Nola ikusten duzue gero- roko lana?

Autokritika batetik abiatu behar genuke. Hego Euskal Herriarekin lan egiten ikasi behar genuke. Aski da drogaren bideari so egitea. Hona datozkigun pertsona berek erraten digute autobusez egiten dutela Baiona eta Donostia arteko bidea, behar dutena eskuratzeko edo eramateko.

ZURE ETXEBIZITZA IPARRALDEAN

Hendaia, Urruña, Ziburu, Donibane Lohizune, Azkaine, Getaria, Baiona...

Adibidez: Hendaian, hondartzatik 300 metrotera, 2 gela, lorategia... 17.500.000 pta.

Zure bigarren txokoa Landetan: Capbreton, Hossegor, Molietes, Seignose, La Vieille de St'Giron. Adibidez: 115 metro baliagarriak, 700 metroko lur laua, iturburua,...zoragarria. 21.500.000 pta.

Informazioa:
INMO-HEGI. 943 320458 - 626337313 - 647709870